

摘藻堂四庫全書薈要

集部

欽定四庫全書薈要

集部

元詩選初集卷五十三

詳校官候選知縣臣吳回華



欽定四庫全書薈要卷二萬四百十三

集部

元詩選初集卷五十三 長洲 顧嗣立 編

陳基夷白齋藁

基字敬初臨海人受業於黃侍講潛從至京師授
經筵檢討嘗為人草諫章幾獲罪引避歸奉母入

吳以教授諸生南州用兵起行樞密院都事轉浙
江行省郎中叅張士信軍進叅太尉府軍事太尉
稱王基獨諫止將殺之不果超授內史遷學士院

學士軍旅倥傯飛書走檄多出其手吳平明太祖
召入預修元史賜金而還洪武三年卒於常熟寓
舍所居有夷白齋故以名其藁金華戴叔能序之
曰我朝自天歷以來學士大夫以文章擅名海內
者有蜀郡虞公豫章揭公金華柳公黃公一時作
者涵醇茹和以鳴太平之盛治學者宗之並稱曰
虞揭柳黃而本朝之盛極矣繼是而起如莆田陳
公之後邁則有得於虞新安程公之古潔則有得

於揭臨川危公之浩博則又兼得夫四公之指授
近年以來獨危公秉筆中朝自餘數公淪謝殆盡
而得先生以紹其聲光雍容紆餘馳騁操縱其得
之黃公者深矣叔能與敬初同門故歷數其源淵
者如此

雞鳧行

雞與鳧皆鷓育鳧愛水遊雞愛陸鳧昔未辨雌與雄母
不顧之雞為伏雞渴不飲飢不啄以腹抱鳧誰敢觸鳧

脫殼雞鼓翼日日庭中求黍稷啄啄呼鳧使之食鳧羽
日襴褌一朝下水不顧雞雞在岸鳧在水賦性本殊徒
爾耳雞知為母不知鳧恨不隨波共生死

白頭公詞

杜陵三月春風煖燕語鶯啼雜絃管落花撩亂紫驕嘶
平樂歸來酒尊滿雨急風篁忽已秋幽鳥多情亦白頭
不隨翡翠枝頭宿却愛鴛鴦水上游春去秋來不知老
安樂即多憂患少綺窻深處語言奇付與紛紛秦吉了

刈草行

原上秋風吹百草半青半黃色枯槁城頭日出光杲杲
腰鎌曉踏城門道門頭草多露未晞爾鎌利鈍爾自知
一人刈草一馬肥馬不肥兮人受笞城中官廩三萬匹
一匹日餐禾一石

新城行

舊城城舊人民新新城城新無舊人舊城城外兵一解
新城城中齊覆瓦萬瓦鱗鱗次第成將軍令嚴雞犬寧

將軍愛民如愛子百賈皆集新城市
浙米淮鹽兩相直
楚人之弓楚人得何時四海無荆棘
北賈販南南販北

裁衣曲

殷勤織紉綺寸寸成文理裁作遠人衣
縫縫不敢遲裁
衣不怕剪刀寒寄遠惟憂行路難
臨裁更憶身長短只
恐邊城衣帶緩銀燈照壁忽垂花
萬一衣成人到家

邊城曲

莫啓匣中鏡怕見頭上雪
莫放弦上箭怕射邊城月
邊

城月闕還再圓頭上髮白何由玄君不見自古邊城有
餘樂夜月聯詩畫棊樂至今月照鄜城頭相國功名齊
斗牛

秋懷五首

寒暑有代謝人事亦推移蹉跎慨疇昔俯仰念復茲籬
落委秋蔓餘葩含夕姿物化諒難窮吾生知有涯皎皎
碧山侶依依青桂枝相逢恐遲暮悵望起遐思

秋夜何迢迢迢迢
一作搖搖不能寐起坐彈孤琴寫此千古

意鳴鳳久寂寥
猗蘭亦顛顛
往聖既莫作
後賢孰當繼
獨憐商山翁
去去復遐逝
空谷亦何有
紫芝聊可餌
如何末路中
亦墮畱侯計
羽翼儻不成
鴻鵠將垂翅
苟可利生民
寧辭暫紆轡
區區後世名
於翁胡足記

羣動夜已息
秋聲適何從
仰視天宇高
微雲浩無蹤
明月在庭戶
河漢上橫從
既莫知所始
何由究其終
我獨弦我琴
微風入疎桐
寫作清商調
感激意無窮

昨日苦炎暑
端居厭煩渴
手短河漢高
井深轆轤折
此

夕秋已清一洗塵世熱紈扇委深笥輕羅換疎葛天運
無停機人生自悲悅急景一以遷流芳遂衰歇洞庭生
微波明河湛初月落葉辭故枝驚鴻亦飄忽為謝同心
友胡為久離別

我有一樽酒獨飲不成歡豈無骨肉親悠悠隔河山亦
有平生友合并良獨難古人千載上世遠不能攀何如
與明月徘徊松桂間月既知愛我流輝照衰顏我亦知
愛月託心同歲寒長願玉宇淨河漢生微瀾四海仰餘

照親友各平安夜見明月人人無苦艱此月不可負
此樽不可乾天地等逆旅流年劇驚湍古人雖云遠其
言若芝蘭舉觴以和之對月更盤桓

分省早集懷錢員外蔡都事湯管勾

閒歲涉戎旅終年廢丘壑一為塵網嬰竟負煙霞約今
晨適公署時暑秋已薄山翠落檐楹湖光映簾幙同袍
二三侶分攜異今昨畏途屬賢勞端居念離索蹉跎媿
衰暮僂俛叅畫諾臨事每參差憂時空蹇諤覽此山水

勝寫我情慮惡遲子早還歸開樽共斟酌

分署望鳳凰山

秋氣日以佳微雲不成雨青山天際來與我為賓主飛
龍及舞鳳突兀在庭戶須臾霧靄收草樹粲堪數寥予
麋鹿姿詎意嬰圭組感縮匪天真驅馳漫塵土偶坐屬
無喧晴空湛空宇欲去復踟蹰此意誰當與

發吳門

以下皆辛丑歲張士信出鎮淮安敬初
以左右司員外郎往叅其軍事而作也

少壯不解武衰老却從軍將相北出師部伍各駿奔伐

鼓震城闕樹羽隱秋旻水師歛龍驤鐵騎紛雲屯軍容
亦已肅士氣悉欲伸載詠東山什感激為逡巡顧余麋
鹿姿辱叅羆虎羣頽然介冑間見此逢掖臣微祿不逮
養匪材胡足珍驅馳寵辱途俯仰媿君親秋風吹海濤
落木滿江津去去勿踟躕浩歌天宇新

大江

夏后道九川江源起西極想當疏鑿際毫髮無遺力奔
流赴東海吐納潮與汐萬古天塹雄洶湧限南北時秋

八月望煙霧四開闢皓月麗中天華星列東壁俯擊亂
流檝仰送搏風翮眼空牛渚舟氣傲南樓席平生臨深
戒所至每兢惕此夕獨踈狂四顧無與敵風伯引輕帆
百怪皆辟易前瞻狼五山亭亭倚秋碧

通州

渡江潮始平入港濤已落泊舟狼山下遠望通州郭前
行二舍餘四野何漠漠近郭三五家慘澹帶藜藿到州
日亭午餘暑秋更虐市井復喧囂民風雜南朔地雖江

海裔俗有魚鹽樂如何墟里間生事復蕭索原隰廢不治城邑靳可託良由兵興久羽檄日交錯水陸飛芻粟舟車互聯絡生者負戈矛死者棄溝壑雖有老弱存不足躬錢鎛我軍實王師耕戰宜並作惟仁能養民惟善能去惡上官非不明下吏或罔覺每觀理亂原媿乏匡濟略撫事一興慨悲風連寥廓

如臯縣

曉行過如臯草露淒已白井邑無人煙原野有秋色緇

褐兩三人牢落徒四壁似訝官軍至拱立衢路側伊昔
淮海陬土俗勤稼穡瀉滴盡桑麻閭閻皆貨殖及茲值
兵燹道路分荆棘十室九逃亡一顧三歎息王師重拯
亂主將加隱惻戒吏翦蒿萊分曹理鹽筴眷眷恤瘡痍
遲遲歷阡陌上天合助順九土期載闢白頭忝戎行臨
風增感激

海安

淮海水為利轉運有常程積渠如積金守防如守城近

聞渠堤壞水決劇建瓴我軍賴神速戮力障頽傾舊防
幸已復新備亦宜興古人重舉衆日費千金并尅敵務

因一作給糧足邊資力耕矧茲淮甸間沃野富吳荆草萊

日加闢餽饗歲彌增勿使土遺利坐令儲侍羸東南力
可舒根本計非輕欲弘中興業斯事力當行陋儒無長
筭觸物有深情冉冉趨畏塗戚戚慎宵征

爛泥洪

猛虎尚可搏蛟龍亦易屠惟有爛泥洪蝨蝨天下無蝨

背甚蠹螫蝨聲殷雷如壯士不敢觸觸者無完膚一齧
使筋露再齧令骨枯牛馬齧盡死矧茲眚者軀造物仁
萬類稔此獨奚需得非庶草蕃變化劇虵虺譬如蠆與
蝨所貴日爬梳否則必滋蔓蔓草苦難圖我欲訴真宰
憤切擬包胥上帝必震怒下令致一作行天誅辱收將中
軍風伯為前驅一鼓清八極斯醜諒安逋爾蝨法必殲
爾洪理難瀦聽眚秉耒耨庶草悉誅鋤要令衆螭都化
為秔稻區作貢奉明祀庶足報錙銖

泰州

吳陵古名邦利盡揚州域舊城雖丘墟新城如鐵石昔
為魚鹽聚今為用武國地經百戰餘士恥一夫敵征人
還舊鄉下馬問親戚躑躅慨蒿藜徘徊認阡陌桓桓霍
將軍出入光百辟位重言益卑功高志彌抑誓欲報仇
讐不肯懷第宅人羨過家榮驚喜爭太息白日照旌旗
閭里有顏色皓首太玄經雖勤竟何益

上樂

夕次秦州郭朝行上樂里密雨灑蒹葭秋風落菰米頗
聞承平際魚鹽賤如水簫鼓樂叢祠謳歌動成市中原
正格鬪擊柝聞四鄙官道日榛蕪生人等螻蟻依依煙
際舟兩兩舟中子來往賣魚鰕出入官軍裏生長離亂
間不識紉與綺失喜見王師被服多華麗買物不論錢
僕僕更拜起何當罷戰伐萬國收戎壘山河歸帶礪車
書復文軌有地盡蠶桑無人不冠履腐儒亦何需歸山
守松梓擊壤盡餘年此樂無窮已

令丁鎮

水路轉下樂遠赴令丁鎮落日淡平蕪荒却帶寒燐平
時富魚稻稅薄民不困蓮芡亦時豐足以禦饑饉江湖
歲或艱老弱行蠹蠹相攜就淮食不得辭遠近四野今
盡荒百畝無一墾鞠為鳧鴈區無復限封畛師行輜重
隨士飽筋力奮經費固有常變通亦宜論吾聞古賢將
羊陸開吳晉食足邊備多高標邈千仞

述老嫗語

歲暮涉淮海不辭行路難從軍豈不樂即事每長歎老
嫗八十餘日晡未朝餐自云遭亂離零落途路間豈無
子與孫充軍皆不還男戰陷賊壘孫存隔河山數月無
消息安能顧飢寒語畢雙淚垂使我心悲酸上天未悔
禍豺虎方構患近聞山東變世路復多端悠悠顛沛人
何時即平安

聽歌水調有感

江流清復清江草接江亭何人歌水調餘韻入青冥歌

者不知苦聽者有餘情坐令離別客白髮鏡中生

謝邨

舟行謝邨路却訪義橋營妖骨埋荒草秋風洗復腥青
山不改色紅樹遠含情當日聞風鶴俱疑是晉兵

塘西

牽舟復搖櫓日出還亭午風遞五林秋雲挾塘西雨盈
盈採蓮槩坎坎迎神鼓對此欲忘歸停橈更容與

鳳口

溪塢晚含風山營夜依谷
栖鳥息復驚歸雲斷還續
畫舸止宵征連艫銜尾宿
戍鼓雜鳴笳秋聲一何肅

東塘

輕舟下溪口却轉東塘路
雞犬近相聞漁樵遠城戍
雖經喪亂後漸有承平趣
處處白蘋花家家紅槿樹

吳江

城邑帶秋水盈盈笠澤渚
西風一夜起鴻鴈盡南飛
晉日東曹掾唐朝左拾遺
長揖謝軒冕悠悠千載期

楚州舊將歌

楚州舊將守楚城身與羣兇殊死爭父母遭烹妻子戮
終天之恨何時平近從王師却征楚歸尋父母身死所
忍疼刺血漬白骨髑髏無言淚如雨烹父之卒今尚存
恐懼復讐前自陳將軍謝卒汝勿畏我志為國非為親
羣兇所重在其首汝輩區區復何有若令殲戮止渠魁
親骨有知當速朽將軍將軍孝且忠天地有盡悲無窮
吾聞古有王陵母仗劍殺身成漢功

織錦篇

絡緯秋啼金井根
佳人當窻織鳳麟
流雲拂拭春無痕
頃刻化作鴛鴦文
銀漢含風星斗搖
虛空迸出黃盤鵬
為君裁作宮錦袍
奪得當年盧肇慄
妾家本住牽牛渚
與君誤結同心縷
人間怪多離別苦
夢落陽臺不成雨
腸斷無心為君織
向君拋却支機石
何時頭戴蓮花巾
相伴雙成禮白雲

送李景先錄判

閭門柳枝短君行不可緩贈君不折楊柳枝勸君飲此
金屈卮丈夫將身誓許國安用當歌傷別為青絲絡控
黃金勒遊宦鄱陽山水國何處春風最憶君琵琶洲上
蘼蕪碧

送姪讓還吳

西風蕭蕭鴻鴈鳴行子悠悠隨旆旌百年衣食仰奔走
四海甲兵紛戰爭猥將筆札事卿相叨備戎行陪俊英
軍中草檄吾何有馬上操觚汝所能人稱阿買八分好

我愛永興戈法精吾女咿嚶學言語汝兒讀書知姓名
中年竊祿正為此使有石田歸力耕汝今還家我羈旅
各勸加餐調寢興陞堂再拜謁從母兒妹踉蹌欣走迎
扁舟石湖上先隴霜露既降草木零丁寧為我戒樵牧
慎勿翦傷松柏青我欲還山結茅屋五岳逍遙期向平
乞身時宰若未許南望白雲勞我情

謝從義參軍自京師還言中書危叅政見問且
訝無書因述詩寄謝

叅軍過我夷白菴為言廊廟高巖巖故人誰為國柱石
臨川先生危大叅猥蒙問及且見訝十載尺書無一緘
憶昔相從客燕趙削去崖岸無猜嫌辱陪五更佐三老
勸講六經陳二南御史不容丞相忌司隸側目宮臣讒
脫身黨籍走吳楚託跡丘園求孔聃孰令展禽三見黜
自分嵇康七不堪平生不解帶刀劍晚歲強使閑韜鈴
髀銷怕騎將軍馬面皺羞著從事衫折衝師旅非夙習
奔走戎行真可慚危言重畏速官謗微祿不逮供親甘

慰情屢抱鰲絲女與國未辦添丁男胡為長年在道路
席不暇煖突不黔幾回乞身向藩省未許曝背歸茅檐
終當投覈謝僚友徑去結屋依山嵐鄙夫出處蓋如此
為報先生聊口占先生事業則異是論道經邦民具瞻
早令四海偃兵甲盡遣百姓趨農蠶時和歲豐我所願
功成身退公當諳他年若訪赤松子一笑相逢掀紫髯

孟冬觀淮水

孟冬日日東風狂長淮水與風爭強層濤如山勢欲立

怒潮逆上相頡頏大舟亂流流轉急人馬螳集駭欲僵
篙師捩柂誇好手迎風簸浪抑且揚小舟徑渡矜勇捷
翩如一葉凌空翔須臾掀舞浪花裏迴瀾百折爭低昂
我聞夏后分四瀆百川受職皆循良邇來洪河恣陸梁
清濁混殽隳舊防昨者王師搯淮口坐制鯨鯢如犬羊
天吳罔象不敢動河失故道誰之殃漢武當年塞瓠子
勞民兆亂紛搶攘中原父子化魚鼈至今千里無耕桑
我欲懇帝勅河伯使復故道安天常清者自清濁自濁

勿冒約束干明章不然帝怒速致討河伯戮死吁誰傷

烏夜啼引

并序

閩人王旻為淮東元帥府奏差被誣繫獄部使者
使泰州尹趙子威讞之平反其寃

烏夜啼在庭樹烏啼啞啞天欲曙阿兒被誣身繫獄盡
室煩寃受荼毒烏啼何為繞吾屋下堂喚婦起聽烏忽
喜淮南兒有書書中報道兒罪脫此樂欣欣天下無兒
歸拜母為母說泰州使君當世傑執法霜臺舊司臬明

如青天皎如月冤獄平反解縲紲已死得生誣得雪海
可枯山可裂使君之德不可滅烏啼愛我庭樹枝我愛
使君君不知使君歸朝奉天子日日聽烏為君喜

次韻答闕元善

跡忝芙蓉幙心依虎豹關老驚詩鬢短貧覺酒尊慳特
達高書記清新庾子山多情憑塞鴈時寄一書還

癸卯二月十二日常熟阻雨寄吳門分省同官

一棹琴川路頻年此往還海風寒挾雨戍火夜連山澤

國龍分節邊城虎據關故人南省幕退食珮珊珊
十六日開船值北風大作復泊北門

風急江難渡天寒雪更飄濟川雖有楫跨海恨無橋使
節辭吳近官軍去楚遙北門仍繫纜山雨夜蕭蕭

三塔寺訪寬老

人世難行路禪房獨掩扉鶴飛知客至雨歇見龍歸天
地干戈滿江湖故舊稀愧非韓刺史臨別更畱衣

送姪讓從軍武安

送爾徐州去秋風幾日程水通彭子國山擁楚王城虎
帳氍毹煖犀船五兩輕從軍古云樂今我不勝情

秋日雜興五首

彈鋏歸來歎薄游西風吹老黑貂裘裁詩見慰慚錢起
掃榻相延愧隱侯擬學楚人歸種橘虛勞蜀客望牽牛
五湖煙景依然在還許扁舟伴白鷗

關山搖落鴈飛遲江漢飄零有所思倦客自憐蘇季子
故人誰問介之推露催絡緯窗間織風緝蠨蛸戶外絲

獨荷慈親念游子倚門日日數歸期

江頭久客日思家坐覺微霜上鬢華節序又催秋後燕
風光爭發雨前花倦游已夢莊生蝶不飲何憂廣客蛇
怪底朝來衣袖薄一川白露下蒹葭

一夕西風木葉飛畫梁落月淡餘輝銀燈夜照還家夢
金翦秋裁寄遠衣霜信早隨新鴈至素書深訝故人稀
無因為謝東曹掾鱸熟尊香莫便歸

明河如練月娟娟坐對清光只自憐夜久不知沾白露

夢回猶記到鈞天
汝南遺老推黃憲
海內諸公憶鄭虔
萬里歸來無寸補
論交慚愧到忘年

寄沈仲說二首

欲採芙蓉寄所思
秋江風露正離離
每因見月懷玄度
可但看詩說項斯
溪上燕辭華屋早
槎頭魚上碧波遲
太平無事差科了
歸共原泉理釣絲

野人籬落並江濱
竹裏流泉竹外雲
好學橐駝惟種樹
莫誇司馬最能文
小橋斜接漁樵路
落日爭呼鴈鷺羣

獨憶詠歸亭上客久留城府思紛紛

次韻錢伯行白芙蓉

帝子西遊太液池一杯秋露為君持空令越女羞容貌
不與唐昌共本支
婬媿最憐無語處風流全在半開時
自移長信宮中去學得班娘淡畫眉

婁江即事簡郭義仲瞿惠夫秦文仲陸良貴兼
寄顧草堂

婁江江上樓居好滄海海頭城邑新蠻郎打鼓爭起柁

鮫客捧珠來售人風燈照人不數點霜月湧波才一輪
人生會合豈易得看劍引杯寧厭頻

次韻懷彥成

沙棠為槩木蘭橈別後令人瘦沈腰采葢暫歸靈越去
栽桃重赴武陵邀醉乘蓮葉春波闊夢落簷花夜雨飄
猶記共遊鳴玉洞滿山明月共吹簫

寄玉山

一作寓笠澤有
懷因風奉寄

我愛玉山佳樹林草堂終歲有餘陰巢安翡翠春雲煖

窗護芭蕉夜雨深
寶篆焚香留睡鴨
綵箋行墨寫來禽
萬竿脩竹休教洗
日日平安報好音

次韻鄭有道喜王季野府判南歸二首

故人日下拜官歸
河水南來似帶圍
策馬遠遊天府勝
食魚偏愛錦江肥
蠶叢故國山猶在
望帝荒祠鳥自飛
萬里欲將慈母線
芙蓉城裏製春衣

海榴花放客南歸
喬木參雲總十圍
綠蟻奉親浮臘味
黃羊充饌割秋肥
恩承閩國榮三釜
心切灤都望六飛

錦里他年須報政中天風露溼朝衣

婁江雜詩

百雉堅城鎮海頭霜風中夜肅貔貅乾坤浩蕩鯨波息
井邑蒼茫蜃氣浮民瘼東來皆可念妖氛西望未全收
將軍莫負黃金印一鼓歸封萬戶侯

與文學古秦文仲遊至正觀

西郭維舟水滿津從容鄭圃得尋真蓬萊路隔人間世
桃李花開劫後春風雨或聞鮫杼響絃歌曾與草堂鄰

交游不忝羊求輩歲晚相期跡未塵

春日邵氏園池

寂莫園林帶夕暉昔年曾此戀芳菲
柳塘水煖鴛鴦浴花徑風酣蛺蝶飛
蔓草拂衣人不翦畫梁無主燕空歸
洛陽池館關興廢我欲春山賦采薇

十一月晦與同幕諸公登南高峰因過湖上小
集二首

共上南屏第一層海風吹鬢雪鬅鬢
山盤地脈來天目

城抱江流似蔣陵近郭晝行多畏虎並湖寒盡未收冰
倚闌閒說承平事知是昆明劫外僧

落日湖頭艤畫船買魚沽酒不論錢共過天下登臨地
却憶官家全盛年綠水映霞紅勝錦遠山凝黛澹如煙
相攜此夕干戈際一聽笙歌一慨然

次韻孟天暉郎中看潮四首

千古英雄恨未銷海風吹上浙江潮怒驅貔虎誰能敵
雄壓鯤鯢不敢驕踏浪掀旗空遠迓臨流捐袂若為招

扁舟浩蕩身先退，輸與陶漁共采樵。
雪湧潮頭萬壘多，秋風扇鬣吼靈鼉。
直疑碧海金鰲擲，復恐陰山鐵騎過。
勾踐功名今寂莫，麻姑消息近如何。
憑君更闡神明力，翻却蓬萊弱水波。

千古東南詫海潮，摩挲強弩未全銷。
氣乘日月分盈縮，聲振山河欲動搖。
擊楫中流歌慷慨，倚闌斜日鬢飄蕭。
錢塘官酒秋仍綠，更與靈胥酹一瓢。

風起城南思慘悽，獨攜長劍倚長堤。
未談秋水驚河伯，

先跨濤江掣海鯢
力障狂瀾扶砥柱
手揮妖祲豁坤倪
東流不盡憑闌意
長笑歸來日已西

淮陰雜興四首

千里相逢淮海濱
一枝誰寄嶺梅春
老來易感山陽笛
年少休輕胯下人
失侶鴈如秦逐客
畏寒花似楚遺民
每過百戰瘡痍地
立馬西風為損神

落木蕭蕭鴈度河
西風嫋嫋水增波
甘羅營裏秋聲急
韓信城頭月色多
淮市有魚聊可食
楚山無桂不須歌

古今無限關心事付與當年春夢婆

江左妖氛掃未清山東豺虎又縱橫欲令斥堠收烽火
須挽天河洗甲兵老馬獨嘶時北望賓鴻相喚盡南征
腐儒媿乏匡時術搔首風前百感生

兵火燒殘百草根人煙無復萬家邨黃金莫鑄忠臣骨
白馬空招帝子魂易水有情人已逝睢陽無援事難論
何當親斬樓蘭首仗節歸朝報至尊

寄陳庶子叅軍兼簡饒介之郎中

楚天漠漠水迢迢千里懷人不自聊帷幄喜聞延曲逆
行間竊忝事嫖姚江空不采芙蓉寄歲暮唯歌桂樹招
華蓋仙翁如見問為言驛肉近都銷

自淮安使江南舟次通州寄同幕諸公

頻年共入嫖姚幙此日先乘使者舟海色曉迎龍虎節
天光寒動鷺鷥裘山川咫尺分吳楚河漢尋常近斗牛
南鎖堰頭官柳樹春風相約繫驂驕

福山港口待潮

吳山如畫楚江平
消得孤帆半日程
潮落沙頭纔一尺
舟停江口復三更
時清不識風波險
世亂方知性命輕
坐擁貂裘待明發
臨風空媿魯連生

癸卯二月十一日官軍發吳門

去年移戍秋將半
今歲渡江春
正分晉國偏裨
歸宿將
漢庭旗鼓屬元勳
戈船十萬盡犀
弩鐵騎三千皆
虎賁
却笑高陽老狂客
謾憑口舌下齊軍

二十日福山港寄省院張思廉陳惟允諸友

漢將西征肅羽儀簡書日日有程期東溟潮上犀船發
南斗星橫虎節移青入楚封山點點白添吳鏡雪絲絲
美人宴罷芙蓉署一色銀花翠壓枝

舟中看虞山有感

一望虞山一悵然楚公曾此將樓船間關百戰捐軀地
慷慨孤忠罵寇年填海欲銜精衛石驅狼願假祖龍鞭
至今父老猶垂淚花落春城泣杜鵑

錢陸燾云此詩為張士德被擒而作

余別有記甚詳孤忠罵寇亦指斥之詞也

二十二日狼山口觀兵

官軍野次狼山口鐵騎犀船盡虎驅杼軸萬家供餽餉
旌旗千里互江湖滕行已伏諸侯將面縛行申兩觀誅
淮海父兄爭鼓舞將軍恐是漢金吾

遊狼山寺三首

天風吹上狼山頂看見扶桑日出初淮海北來吞兩楚
江湖南去控三吳珠宮貝闕馮夷宅古木蒼藤帝釋居
為訪祖龍鞭石處拇窠履跡定何如

鯨波渺渺四無涯
閭闔天低手可排
一塔倚空凌浩劫
兩潮爭港撼層崖
半晴半雨龍歸海
衝煖衝寒鴈度淮
安得乞身依佛日
遍尋靈迹訪齊諧

五峰相顧若枝撐
力障狂瀾與海爭
下界人居龍伯國
上方僧住梵王城
佛庖香訝山無蕨
公膳腥嫌市有螿
王事息息騎馬去
落花啼鳥總關情

二十六日自通州赴淮安

海虞城外經旬泊
狼五山前信宿留
六計西來思撓楚

三軍左袒願一作欲安劉龍光夜吐雌雄劍魚尾朝銜甲

乙舟今日南風催挂席浪花飛雪打船頭

二十九日至淮安城南十五里述懷

欲向江湖覓釣磯此心長與事相違
添丁未辦盧仝計
算老空知伯玉非
淮甸草肥宛地馬
楚州人著漢官衣
將軍奏罷平西捷
還許山翁倒載歸

三月十五日由淮安使江南別同官

三月淮安柳色深
相看去住兩關心
鷺因求友聲逾切

鴈為離羣思不禁芳草將春青楚甸暮雲含雨碧吳岑
遂初爾有平生賦何事驅馳雪滿簪

分省諸公邀西湖宴集

湖上相逢宴屢開紫薇花下約同來水光釀綠凝歌袖
山色分青入酒杯蛺蝶影隨羅扇動琵琶聲逐畫船回
獨憐英骨埋芳草南拱枝頭蜀鳥哀

送謝參軍十八韻

帷幄掄才日君侯許國年三吳修職貢六合倚蕃宣絳

灌功難並龔黃政獨賢金湯新設險琴瑟重張弦借寇
心雖切安劉策最全甯甘周顛泣勇著祖生鞭殺氣連
區夏妖氛互海壖丹心期捧日赤手欲擎天綠愛蘇堤
柳紅依庾幕蓮此行真特達臨別更留連夜感西湖席
春回震澤船輕風吹解纜落日慘離筵浩蕩十年客衰
遲百慮牽眼青慚阮籍頭白事孫堅迹忝樞機近恩沾
雨露偏委身同草莽報主乏埃涓知己青雲上忘形太
古前願君容一壑隨分老林泉

次韻垂虹橋泊舟倡和

何年伐石駕危橋，鯨浪翻江白雨飄。
勢控三吳虹倒影，氣吞七澤水通潮。
重淵有怪犀難照，蔓草無名火不燒。
伯國黃金聞鑄像，王門白玉想為標。
功成海上身先退，膾熟江東興可邀。
歲月幾何流水逝，山川如舊古人遙。
鴻飛矰繳何由篡，鶴去樊籠不可招。
浩蕩扁舟歸鑑曲，寂寥方丈似中條。
越人尚以雞為卜，楚俗相傳鵬類鴉。
自把文章論倚伏，敢將交態較淳澆。
五湖煙景隨時異。

萬里風萍觸處漂，却憶春暉樓上去。
為君裁取玉為簫。

題柯學士畫竹

羣玉仙人佩水蒼，金莖分露服琳琅。
曾將天上昭華琯，吹作飛龍奉玉皇。

題倪元鎮畫

西池亭館帶芙蓉，雲水蒼茫一萬重。
此日畫圖看不足，滿簾秋雨夢吳淞。

次韻劉德方經歷

白露池塘點翠荷
越羅衣袖覺秋多
梨園弟子今華髮
唱得開元供奉歌

次韻送彥成玉山

著屐溪頭日日過
驪駒歌斷奈君何
虎丘山下東流水
爭似春愁一半多

戲和玉山韻

西子湖邊蘇小宅
錦官城裏薛濤家
來時豈蕊初含藥
別後菖蒲又著花

涿州 以下外集

仲冬過漁陽風日正淒厲嗟此豪俠窟自古稱壯麗煌煌神堯業起自艱難際奈何至中葉四海皆鼎沸良由開元主養虎以自噬惜哉曲江公忠言諒何濟居人一何幸屬此承平世耕牧畿甸門聖澤湛汪濊連山接神臯旭日生爽氣獨憐去國人南征從此逝

阜城

憶昔日下歸已甘棲遯迹胡為負初志三歲四行役我

馬不及秣我僕不遑息荏苒歲月暮展轉憂患逼朝行
過阜城原野霜露白一身如鴻毛苦厭天地窄

凌州

曉出凌州南晝行泥淖中一步一踟躕四顧心忡忡牽
車者誰子自言業為農頻歲值大水田廬為之空家有
白髮親日食憂不充辛苦事商旅庶以供殮養維人生
兩間所貴親愛鍾貧賤苟知養奚必祿位豐丈夫畏天
命敢不哀人窮生世苦不偶何由恤痲痾

舊縣

披衣聽雞鳴膏車待明發蕭條古東阿遺堞帶殘月紆
餘入空谷躑躅尋舊轍前瞻闕無人四顧皆積雪悲風
泱泱至僕夫慘不悅驅馳二十里晴旭生木末稍欣山
色佳緩轡行復輟我生一何愚奔走恆挈挈賦命與仇
謀險艱難備說蹉跎三十餘益歎身世拙豈無浮海志
實恐甘旨闕緬懷古聖賢感激腸內熱

施家莊

陸行已兼旬歲莫誠勞苦積雪兼層冰跬步憂齟齬
投施家莊居民喜相語累日陰沍消舟行了無阻勇辭
所乘車側耳聽柔櫓歌雜吳謳頗復慰羈旅人言前
年夏洪河走平楚漕渠當其衝漫漶不可禦民廬悉漂
沈桑田眇何許所以亡命徒潛蹤匿蘆渚乘間作盜賊
往往遭殺虜我方為飢驅願言適樂土中原不稼穡去
去復何所

徐州

一昨始入舟遙望徐州郭水行已信宿甫至城下泊洪
濤蹴長空驚風怒相薄乾坤無端倪雲水互叅錯初疑
鯨鯢鬪復恐蛟鼉躍篙師為蒼黃客子俱駭愕傷哉楚
君臣伯圖已寂莫空餘蘇公樓突兀倚寥廓徐人昔恃
公安若山與岳文章與元氣萬古相磅礴大河失故道
崩奔勢逾虐生人化魚鼈中州廢耕鑿安得不世才為
君拯民瘼九原何茫茫可愛不可作

龍橋婦

婉孌龍橋婦空閨何惻惻夫壻弱冠餘南征死鋒鏑但
見鄰人歸不知夫蹤跡委身奉舅姑誓志如金石朝采
陌上桑莫向窗間織織成錦回文無處寄消息織成雙
鴛鴦無復合歡夕何如織縑素裁翦信刀尺為舅作衣
裳為姑為飲食

夏夜懷李尚志

蟋蟀已在壁煩暑猶未歇離居感時序憂端難斷絕綠
樹含微風明河湛初月念子行未歸徘徊至明發

七月望日值雨宿窖中

西游復入河東路，複嶽重岡愁屢度。
崎嶇五里不到河，雷忽椎山雨如注。
須臾百水爭怒流，瀕洞忽若龍騰湫。
熊羆遁藏虎豹伏，魑魅亂叫狐狸愁。
我馬在前我僕後，我行一步一回首。
陰風吹人股為慄，破帽籠頭衣露肘。
疾呼東來皓首翁，問勞慰我心忡忡。
相延入谷已暝黑，下馬共栖營窟中。
不知今夕復何夕，俯仰人間長太息。
勞生何必為形役，歸有衡門且容膝。

潼關

河渾渾關嶢嶢太古已來神禹鑿前車未行後車却去
馬一鳴來馬愕自從虎視繼龍興周道不復如砥平至
今惟有秦川路千里秋風落葉聲

題畫

連山高高上無極仰視青天不盈尺俯覽可以窮九域
我疑山靈應上訴帝遣夸娥運神力又疑蓬萊脫左股
萬里飛來倚空碧乾坤一色雲冥冥急霰始集雪又零

依依度橋者誰子隱隱操舟如送迎萬壑千巖深且窈
兩兩相將事幽討若非淮南訪八公定是匡廬尋五老
意匠經營妙入神披圖爛熳皆天真人間何處有此境
我欲從之一問津

函關二首

水宿煩津吏山行信館人度關車躑躅入谷馬逡巡石
戴泥中轍風驚塞外塵憂時非肉食華髮為誰新

萬里西游客歸期趁早鴻澗泉明曉練山果落秋紅烏

度煙嵐外人行泥淖中前途逢驛使立馬問關東

江

澤國長雲雨春山半有無江源起巴蜀地勢控荆吳客
舍依鮫館蠻裔雜賈胡明時方利涉吾道未乘桴

久雨

久雨妨農事那堪夜復晨雲浮滄海日花誤洞庭春行
路悲游子匡時仰大臣未甘栖遯跡霄漢有通津

徐州

日上彭城獨倚樓
關河迢遞水空流
不因躍馬江東去
安得歌風沛上游
草帶虞姬亡日淚
山餘亞父病時愁
如何舞罷鴻門劍
不向咸陽一少留

江上客舍

曉來江上雨濛濛
煙火蕭條客舍中
風急最憐巢幕燕
春寒猶滯寄書鴻
紛紛洲渚魚鹽聚
歷歷東南貢賦通
萬里乾坤一羈旅
濁醪今夕與誰同

江月樓

中天樓閣鬱嵯峨良夜其如水月何雪浪遠從三峽至
露華偏傍九霄多道人宴坐修禪觀游子登臨聽棹歌
曾是水晶宮裏客倚闌來此重婆娑

輾轅

遠遊重到洛陽城又向登封道上行路入輾轅秋更險
雲收太室雨初晴千重灌木漫山碧百道飛泉繞澗鳴
欲訪巢由渺何許空餘潁水照人清

呂梁

扁舟又向呂梁歸浩蕩中流看翠微濁浪滿河冰亂走
黃雲垂地雪交飛奉身誤叱王尊馭涉世頻沾阮籍衣
日莫不須吹短笛沙鷗猶恐未忘機

淮陰侯廟

慷慨論兵笑沐猴盡將生死付鄼侯手提漢鼎歸真主
眼見黃旗出偽游此日王孫歸故國何年漂母葬荒丘
英雄自古多遺恨腸斷秋風楚水流

次韻答秦文仲郭義仲聯句見寄

客路尋常江海上春光強半雨聲中習池無酒醉山簡
蓮社有心期遠公香燼旋溫婆律火茶煙輕颺石楠風
不因二仲聯詩至安得從容一笑同

江亭

江水出峨岷江亭俯要津諸侯皆職貢百粵漫風塵恩
詔傳中使遐方倚外臣出師勞上將入幕富嘉賓聞道
元戎死頻傷義士神三軍宜雪恥百戰莫憂身巫峽長
多雨瀟湘已莫春鼎魚何足制奏凱勿逡巡

題水殿納涼圖

白苧衣裳懶自裁，手搖羅扇此徘徊。
水晶宮殿涼風少，欲勸君王築露臺。

倦繡圖

宮門深鎖晝偏長，懶把春雲繡作裳。
恨不將身化蝴蝶，長隨飛絮近君王。

蓼花雪姑圖

紅蓼花開水滿洲，西風吹夢總成秋。
銜泥不及三春燕，

兩兩巢君翡翠樓

寄蕭尊師

以下玉山雅集
名勝諸本錄入

我昔山中尋紫芝道遇真人行若飛
自言鍊骨有仙術曾事神農為雨師
自從別後三千歲不住塵寰即方外
我昨題詩遺羨門為問真人定安在
荅云往日隱東蒙上下風雨騎蒼龍
只今賣藥居靈越來往三吳弄明月
天上非無十二樓人間乃復愛滄洲
時時跨鶴乘雲氣歷覽無窮跨九州
勞生苦為塵緣縛安得從之超廣漠

手折三株海上花去隨鸞鳳巢阿閣

寄姚子章

聞君又作錢塘客多在青樓少泉石佳人姓蘇名小小
占斷西湖好春色沙棠為舟桂為槳驚起鴛鴦飛兩兩
有時醉倒百花間不記六橋新月上行樂須當少壯時
英雄自古皆堪悲歸來莫負張京兆鸚鵡窗間喚畫眉

偶成二首

一作近體二首寄
玉山并簡彥成

武陵溪水碧灣灣窈窕幽期不可攀戴勝桑間飛自得

王睢洲上語相關歌成桃葉臨流和采得蘋花帶月還
見說荔支漿已熟不分涓滴到人間

南州五月尚兼衣白苧窗間未脫機青李來禽書不至
荔支盧橘賦多違水晶簾箔圍晴晝艾納鑪熏逗夕霏
為問上都城裏客菖蒲

一作昌陽

花發幾時歸

賦楊花

巷南巷北晝冥冥搖蕩春風未肯停薄命不禁巫峽雨
前身曾化楚江萍已於謝女詩中見更向劉郎曲裏聽

腸斷不堪回首處，竝人飛過短長亭。

次錢伯行韻

五月東林水竹涼，新荷葉小柳絲長。且臨大令鷺羣帖，不戀尚書雞舌香。楚客謾誇千樹橘，杜陵共愛百花莊。滿天風露枇杷熟，歸奉慈親取次嘗。

次沈仲說韻

棟樹飛花雪打篷，居人行樂四時同。波涵大澤平如掌，雲割西山半入空。金刹遠瞻樓閣壯，畫船爭載綺羅紅。

如何越女承恩後不逐吳王住甬東

織錦圖

佳人織錦深閨裏恨入東風淚痕紫
三年辛苦織回文化作鴛鴦戲秋水
秋水悠悠人未歸鴛鴦兩兩弄晴暉
料應花發長安夜不見閨中腸斷時

次韻趙君季文贈杜寬吹簫築吟

寒竹初栽蘆葉秋夜吹百花洲上樓
千金縱有狐白裘難買杜寬一藝優
妙知音律能周鑊薛家小童安敢侔

江空月白爛不收冥搜罔象悲陽侯哀泉鳴咽秦隴頭
何年變曲為涼州神工太古開黃牛驚浪出峽風颭颭
落葉秋隨渭水流渭水有盡情無休絲絲又若繭緒抽
要眇寧以智力求須臾水激龍騰湫熊羆夜咆魑魅愁
勸君不用皓齒謳側耳聽此消百憂寬也胡為淹此畱
自合天上參鳴球飄然我欲歸帝丘仙人張樂煙霧浮
蒼龍為車挾翠蚪千秋萬歲遲子同遨遊

寄友人

扁舟三月到江城
匹馬先尋北郭生
雨過小樓春寂寂
鳥啼脩竹曉嚶嚶
家無黃耳傳鄉信
門有蒼頭記客名
見說終南真可隱
賸判秋色為君清

題葛仙翁移家圖

是處青山可鍊丹
問君拔宅向何山
縱令兒女恩情重
雞犬何心不肯還

再題葛仙翁移家圖

列仙之人其道無為超然物表
游於希夷厚祿不足致

好爵不足縻所以許由辭堯不受禪巢父聞之猶為洗
耳河之潛奈何葛仙翁與世猶支離求為勺漏令所欲
何卑微觀翁此行亦良苦妻子辛勤童婢飢翁知學仙
不學吏委以民社將安施仙家雖云足官府奈此人間
小黠并大癡君不見陶潛棄官歸故里又不見馬援謗
輿由薏苡縱得丹砂亦不多誰信翁心澹如水雲門山
有靈藥歸去來山中樂牛羊任所之雞犬從人縛急將
印綬送還官變却姓名稱抱朴

題杏花鬪鵲

爾鵲莫逐朝飛雉雙雌爭雄俱鬪死爾鵲莫逐營巢燕
吳宮失火難相見飲啄不離碧山阿栖止還依嘉樹柯
王孫縱有黃金彈紅杏花間奈爾何

君住耶溪南

君住耶溪南我住耶溪北咫尺不知名采蓮始相識君
愛蓮有花我愛蓮有實花實本同根君心勿相失

送君當遠涉

送君當遠涉蘭舟桂為檝君去不思家妾夢長相接采
蓮將遺君采花不采葉妾貌不如花君心不如妾

貞女慎行露

貞女慎行露君子戒履霜歲莫懷百憂離居增慨慷方
舟豈無楫河水亦可杭臨流不能度佇立以徬徨

題徽廟馬麟梅

內家春色少人知玉蘂冰蕤看轉宜說與宮中小兒女
畫樓瓊瑁莫輕吹

題管夫人竹

綺窗春影綠婆娑
夢作輕雲覆碧波
日莫是誰調錦瑟
一江煙雨泣湘娥

文殊寺高閣

何年蘭若倚崔嵬
觀閣連天卷畫開
澤國魚龍霜後靜
關河鴻雁日邊回
闌干迥遡虛空上
歲月深從浩劫來
自信平生愛登覽
夕陽高處重徘徊

次韻袁仲長竹堂感興

一曲桃源憶故人
白頭詞客最傷春
南柯已寤平生夢
東海曾揚幾劫塵
綺樹鶯花從自好
畫堂絲竹為誰陳
不須聞此空惆悵
且看瑤姬舞繡茵

次韻錢伯行飛雲樓小集懷王季野

為惜春光一半過
如澠美酒汎金波
共知此會情偏重
獨恨平生飲不多
鼓瑟欲終仍緩節
投壺纔罷即高歌
却憐燕子樓中客
蘇小橋邊奈樂何

寄葛子熙楊季民

并序

去年客京師與江西葛子熙楊季民飲於濟南張
署令家以櫻桃薦酒時季民將赴灤陽屬予賦詩
而子熙為之書子還江南一載而二子尚留京師
張君亦未離太常感時撫事悵然興懷因賦長句
一首奉寄

去年京國櫻桃熟公子親沾薦廟餘色映金盤分處近
恩兼冰酪賜來初酒酣惜與楊生別詩罷叨從葛老書
今日江南春雨歇亂啼黃鳥正愁予

簡鄭山人

國士文章海內傳
丘園風雨故依然
空聞太守延徐禕
猶喜諸生禮鄭玄
官樹鸞啼初繫馬
講堂雀下或銜鱣
廣文方築招賢館
冑使先生老一鱣

送庸田司寶惟善經歷

籍甚中朝彥
翩然萬里情
禮從蓮幕重
詩到水曹清
未雪辭吳會
先春入薊城
殷勤黃閭老
能不問蒼生

次韻叔方寄沈仲說

公子新成江上宅更依西渚結幽亭時清墟里還無警
月黑柴扉不用扃流水暗和琴瑟響好山濃入畫圖青
故人白雪歌難和孺子滄浪曲自聽每厭狂夫談酒譜
還從處士授茶經庭前賸折忘憂草不負君家玉膽瓶

八月十三夜汎姚城江二首

畫船撸鼓唱回波皓齒青娥不用歌好月愛看輪未滿
清秋莫問夜如何明將織女機絲動寒恐姮娥白髮多
天上清光應更足羽衣安得共婆娑

何年江水出姚城轉覺東南地勢傾
彩月夜當河漢動
客星秋入斗牛明
一波不起魚龍靜
百穀初登海宇清
生喜太平身少壯
浩歌擊楫豈無情

次韻錢伯行中秋翫月

桂影婆娑白兔閒
九霄風露滿江山
斗牛直上天懸近
河漢西流夜莫攀
織女機絲清淺際
姮娥宮殿有無間
坐看博望乘槎處
安得相從萬里還

聽寧上人彈琴

忽忽歲將晏鬱鬱不自聊况茲霜露集驚飈振寒條之
子從何來攜琴到衡茅為我理素曲五音紛以調莊聽
歛手衽幽憂為之消鸞鳳戲雲中餘音相與飄別鶴驚
宵露衆葩悅春朝婉麗不可極忽復變蕭寥清風散六
合白日耀層霄流水一何澗泰山一何高聘魯慨觀樂
適齊感聞韶疇知今日樂俛仰千載遙寤言欲報之媿
乏英瓊瑤

次韻錢伯行江上春莫

太湖之水近當門
荇葉芹芽煖正繁
不問主人還看竹
每逢鄰叟為開尊
燕歸王謝江邊宅
犬吠朱陳柳外邨
步屨春風歸去晚
野童篝火候籬根

僕嘗夜夢從彥成飲
彥成曰此荔枝漿也
飲之令人壽
子能為我賦之
當贈三百壺
予自口占一詩
覺乃夢也
及會玉山聞彥成釀酒
果名荔枝漿
以夢白之不覺大笑
玉山曰君當書此詩
吾當與子致酒
以質所夢
因莞爾書之
彥成見

之必更一笑也

涼州莫謾誇葡萄中山枉託松為醪仙人自釀真一酒
洞庭春色嗟徒勞瓊漿滴盡生荔支玉露瀉入黃金卮
一杯入口壽千歲安用火棗并交梨不願青州覓從事
不願步兵為校尉但令喚鶴共呼鸞日日從君花下醉

鴻鴈篇

鴻鴈雙雙度鴈門相呼相喚不離羣晝銜蘆葦防矰繳
夜宿關河同夢魂稻粱既足江南闊秋水增波葉微脫

洞庭湖畔卧雲沙
彭蠡磯頭弄煙月
一朝無事忽相違
一向東飛一向西
西飛渺渺秦山曲
東去悠悠滄海湄
秦山滄海遙相望
顧影徘徊各惆悵
山有猩猩與網羅
水有蛟鼉與風浪
回頭却恨不同栖
辛苦皆因獨自飛
不問天南與天北
何時相見得同歸

題玉山草堂

隱居家住玉山阿
新製茅堂接薜蘿
翡翠飛來春雨歇
麝香眠處落花多
竹枝已聽巴人調
桂樹仍聞楚客歌

明日扁舟入青浦

一作
州府

不堪離思隔滄波

綠波亭

眼明忽見此亭新
公子詩成思入神
坐愛碧波千頃綠
夢回芳草一池春
每傾鸚鵡畱佳客
欲采芙蓉寄遠人
燕子不來秋已暮
倚闌無語獨逡巡

柳塘春

扁舟二月傍溪行
愛此林塘照眼明
芳草日長飛燕燕
綠陰人靜語鶯鶯
臨風忽聽歌金縷
隔水時聞度玉笙

更待清明寒食後買魚沽酒答春晴

漁莊

何處林塘好卜鄰清江繞屋淨無塵定巢新燕渾如客
汎者輕鷗不避人楊柳作花香勝雪鱸魚上釣白於銀
春風無限滄浪意欲向汀洲賦采蘋

秋懷奉寄玉山主人

江上秋陰十日多思君不見奈愁何風高澤國來鴻鴈
雨入汀洲落芰荷公子文章裁瑞錦佳人衣袖翦輕羅

畫船亦欲溪頭去聽唱花間緩緩歌

有懷梧竹主人山陰道士雲臺外史兼簡龍門

開士

碧梧翠竹日扶疎長夏高堂可晏居雲上故人時載酒

山陰道士近無書蒼頭埽

一作拂

石安碁局穉子穿花奉

板輿若見惠休煩問訊碧雲詩句定何如

別後聞入杭賦詩以寄

柳洲寺下絲竹繁蘇小墓邊風日暄天開十里水如鏡

雨過六橋花欲言
畫船夜聽孤山鶴
鐵笛曉驚天竺猿
歸來相遲桃源上
為唱竹枝傾綠樽

寄玉山兼簡匡廬外史

美人不見已三月
日日相思賦角弓
興發頗疑詩有助
憂來翻訝酒無功
未須結客游樊上
却儼移家住灤東
與報匡廬于外史
新醅宜壓荔枝紅

笠澤有懷

碧梧翠竹鬱參差
艾納流薰繡幕垂
瑤管隔花聞度曲

畫屏燒燭看圍碁坐延太乙青藜杖倒著山公白接羅

何日扁

一作綠

舟還蕩槳為判同醉

一作飲

習家池

將往三沙有懷玉山徵君會稽外史

三沙舊稱三洲

海門自與碧天通獨馭靈槎遠向東一道銀潢秋浪白
三洲金刹日華紅龍吹花雨慚聞法鳥語雲檣喜報風
無奈思君重回首依依江樹送冥鴻

羣珠碎傷吳帥潘元紹衆妾作

潘七妾皆青年絕色善纂組歌

詞因潘出軍恐
致疑皆自經

繡紋刺綺春纖長
蘭膏鬢鬢瓊肌香
芳年艷質媚花月
三三兩兩紅鴛鴦
翠靴踏雲雲帖妥
海棠露溼臙脂朶
冶情紛作蝶戀春
新曲從翻玉蓮瑣
畫堂銀燭天沈沈
揚眉一笑輕千金
明珠買得綠珠心
欲揮魚腸掃妖孽
主君勿疑心似醉
一宵痛擊羣珠碎
門前鐵騎嘶寒風
竒勳解使歸元戎

陳湖秋汎

平湖秋色曉蒼蒼
鼓柁聲傳浦溆涼
鴻鴈欲來天拍水

蒹葭初老露為霜
菊荒甫里人何在
鱸入松江興轉長
不用臨流重懷古
葦花菱葉滿滄浪

次韻懷華幼武

滑滑春泥滿郡城
出門騎馬不堪行
未能學道從緱母
且復忘憂對麴生
流水小池垂釣影
春風淡巷賣花聲
停雲賦罷心如渴
安得滄浪濯我纓

次韻虞隱君堪潘閩掾穀雨中見寄

吳箋新製玉鸞紋
衝雨殷勤寄華門
燕子不來人獨立

自拈湘管認啼痕

題趙魏公墨竹

魏公仙者徒清風動千古夢斷江南春飄飄游帝所鈞
天張樂如洞庭十二參差鸞鳳鳴歸來記得當時曲寫
作湘靈鼓瑟聲高秋素壁含蕭颯彷彿涼風起閭闔滿
天明月浸漚波歲晏懷人霜露多

至正十一年正月一日遂昌鄭元祐龍門僧良
琦臨海陳基聯句送匡廬道士于彥成歸越兼

簡蕭靖復盧益修

歲朝逢王春雨雪暗吳下行人當明發祐別袂慘莫把

飄颻賀監舟基蹠躐靈運馬山驛梅始繁琦溪船浪仍

打行紆莊烏吟祐去結遠公社禹穴紬奧編基蘭亭集

羣雅神運鶴覽朗風標鶯經寫祐雙鳧繼遐躅千秋祝

純嘏基信憑回潮尾春融枯樟髀祐越臺瞰蓬瀛胥濤

駕龕赭基白戰隱鞍甲綠醕酣觥筯祐智囊倒精悍詞

鋒發侈哆琦蕭臺多神仙盧敖本靜者道樞混溟滓語

穿脫謏髀

祐

但令冠峩峩，冑羨綬若若。滄海等稊米，黃

金真土。直接羅或露，髮短褐不掩。蹠捷若矢，離弦勇如

金躍冶青雲步。伊始白雪和，殊寡

基

土膏動句萌春情

滿原野

琦

桂樹歌詎已，桺枝折難舍

基

別夢梁月墮清

談松風灑

琦

蓬藿既可居，蘆菔自堪鮓


基

望望玉山阿

來期卜燈炮

祐

元詩選初集卷五十三



總校官候補中書臣吳紹潔

校對官編修臣馬啟泰

謄錄監生臣張桴